

Mid-Day Dogri News Bulletin, 16 August 2025

समा – 12:25 hrs.

<><><><><><>

CM- Chashoti Cloudburst

मुख्यमंत्री उमर अब्दुल्ला होरें कल किशतवाड़ जाइयै चशौती च बददल फटने करी प्रभावित मकामी लोकें कन्नै मलाटी कीती। इस हादसे च तकरीबन 60 लोकें अपनी जान मुहाई दिती ऐ ते 100 कोला मते लोक जखमी होई गे न। आकाशवाणी दे जम्मू संवाददाता नै जानकारी दिती ऐ जे मुख्यमंत्री होरें उत्थें होए दे नुकसान दा आकलन कीता ते जमीनी स्तह पर हालाता दा जायजा लैता। मेद बुज्झी जा रदी ऐ जे अज्ज मुख्यमंत्री होर हादसे आली थाहर जाइयै आपू बचाह अभियाने दी समीक्षा करगंन ते लोड़ पौने पर होरनी स्हूलतें दी उपलब्धता यकीनी करने लेई निर्देश बी देगंन। तुंआई प्रधानमंत्री नरेन्द्र मोदी होरें उपराज्यपाल मनोज सिन्हा ते मुख्यमंत्री उमर अब्दुल्ला हुन्दे नै गल्लबात करियै हालाता दा जायजा लैता ते केन्द्र आसेया पूरी-पूरी मदाद देने दा भरोसा बी दिता। प्रधानमंत्री होरें हालात दा जायजा लैन्दे होई बचा कम्में गी होर तेज करने पर जोर बी दिता। उआं केन्द्रीय मंत्री डाक्टर जितेन्द्र सिंह होरें बी कल चिशोती गां दा दौरा लाया ते उत्थे चला रदे बचा कम्में दा जायजा लैता।

<><><><><><>

Dy CM –GMC Visit (Byte)

मुख्यमंत्री सुरिन्दर चौधरी होरें कल सरकारी मैडिकल कालेज ते अस्पताल जम्मू दा दौरा लाया ते किशतवाड़ च बददल फटने करी प्रभावित लोकें कन्नै मलाटी कीती। दौरे दौरान उपमुख्यमंत्री होरें प्रभावितें दी ढौल पुच्छी ते उनेंगी दिती जा रदी मैडिकल स्हूलतें दा जायजा लैता। उनें प्रभावितें गी यकीन दोआया जे सरकार उन्दे कन्नै खड़ोती दी ऐ ते उन्दे तौले नरोए होने लेई उनेंगी हर मुमकिन मदाद उपलब्ध करोआई जाग। इस दौरान मीडिया आलें कन्नै गल्लबात करदे होई उपमुख्यमंत्री सुरिन्दर चौधरी होरें आक्खेया जे इस दुख गी गिनतरी च ब्यान नैई कीता जाई सकदा।

<><><><><><>

Satish –GMC Visit (Byte)

सिड़क यातायात मंत्री सतीश शर्मा होरें कल GMC जम्मू दा दौरा लाइयै बददल फटने कन्नै प्रभावित लोकें दी ढौल पुच्छी। दौरै दौरान मंत्री होरें जखिमयें कन्नै गल्लबात कीती ते उन्दे तौले नरोए होने दी कामना कीती। उन्नै अस्पताल प्रशासन गी हर मैडिकल स्हूलत उपलब्ध करोआने दे निर्देश दिते।

एहदे परैन्त मंत्री होरें इस कुदरती क्रोपी कन्नै प्रभावित लोकें दे जम्मू च घरें जाइयै दुख ते बसोस प्रगट कीता। एहदे इलावा ओह इस हादसे च जान मुहाने आलें दे खीरी संस्कार च बी शामिल होए।

<><><><><><>

Rana -FWD Village Visit

जल शक्ति मंत्री जावेद अहमद राणा होरें इस गल्लै पर जोर देइयै आक्खेया ऐ जे जम्मू-कश्मीर सरकार दा मकसद दूर-दरेडे ते सरहदी इलाकें च समावेशी ते टिकाऊ विकास गी यकीनी करना ऐ। मंत्री राणा होरें एह गल्ल LoC कश Chakkan Da Bagh दे कोल अगेत्रे गां Khari दे दौरै दौरान आक्खी। पुंछ च राष्ट्रीय झंडा चाढ़ने दे बाद मंत्री होरें Khari गां दा दौरा लाया ते उत्थे बन्ने पारा तना दौरान आई दी चुनौतियें बारें आकलन कीता। मकामी लोकें कन्नै गल्लबात करदे होई मंत्री होरें भरोसा दोआया जे सरकार सरहदी इलाकें च रवा रदे लोकें कन्नै पूरी चाली खड़ाती दी ऐ ते उन्दी सारी दिक्कतें ते परेशानियें गी दूर करने लेई वचने-बज्झी दी ऐ।

<><><><><><>

Rana –Dialogue

जल शक्ति मंत्री जावेद अहमद राणा होरें कल पुंछ च प्रमुख बुद्धिजीवियें, साबका अधिकारियें ते सिविल समाज दे सदस्यें कन्नै इक संवाद-सत्र आयोजत कीता। इस सत्र च जिले च शैक्षणिक बुनियादी ढांचे, स्वास्थ्य सेवायें ते समग्र विकास सरबन्धी कमियें उपपर व्यापक चर्चा कीती गई। इस चर्चा च लोकें दे जीवन स्तर गी उबड़ा चुकने लेई विशेष तौरा पर दूर-दराज ते अविकसित क्षेत्रें च व्यवस्थागत सुधारें दी जरूरत उपपर जोर दिता गया। सिविल समाज दे प्रतिनिधियें, इक संवेदनशील, समावेशी ते नैतिक मूल्यें उपपर आधारित इक जिम्मेदार समाज दे निर्माण दे उद्देश्य कन्नै कैई रणनीतिक हस्तक्षेपें दा सुझाव दिता।



Prog. Announcement

आकाशवाणी जम्मू दी क्षेत्रीय समाचार इकाई 15 अगस्त गी 79में स्वतंत्रता दिवस उपपर, प्रधानमंत्री उन्दे राष्ट्र दे नां सम्बोधन उपपर 30 मिनटें दी इक विशेष चर्चा कार्यक्रम आयोजत करा रदा ऐ। एह विशेष प्रसारण अज्ज दपैहरी साङ्गे 12 बजे प्रसारित होग। इस विशेष कार्यक्रम च साहङे परौहने होगंन वरिष्ठ पत्रकार अजत जम्वाल, जेङे इस विशे उपपर अपने विचार सांङ्गे करगंन। कार्यक्रम दी मेजबानी करगंन साहड़ी न्यूज एंकर, श्रुति खजूरिया। एह कार्यक्रम तुस Medium wave-303 मीटर यानि 990 किलो-हार्टज, FM 100.3 मेगाहार्टज ते FM 104.5 मेगाहार्टज उपपर सुनी सकदे ओ।



Janmashtmi

भगवान कृष्ण हुंदा जन्म ध्याड़ा “जन्माष्टमी” दा त्योहार अज्ज देश दे बाकी हिस्सें आहला लेखा जम्मू खिते च बड़े धार्मिक उत्साह ते श्रद्धा कन्नै मनाया जा रदा ऐ। बड़डलै थमां गै श्रद्धालु भगवान कृष्ण हुंदे बक्ख-बक्ख मंदरें च मत्था टेकन आवा रदे न। जम्मू दे बक्ख-बक्ख मंदर इस्कॉन ते होर बक्ख-बक्ख धार्मिक थाहर, शैल सनाहकड़े ढंगै कन्नै सजाये गेदे न ते भगवान श्री कृष्ण हुंदे जन्म ध्याड़े दा जशन श्रद्धा ते उत्साह कन्नै मनाने लेई पूरी चाल्ली तयार न।

